

ARALAR ILDOA. Apirilaren 9an bukatuko da hauteskundeetako zerrendak aurkezteko epea

Aralarrek ordezkari legala izendatu eta bozetan izateko pausoa eman du

Zabaletak dio Hautes Batzordean egindako izendapenak «inolako garrantzirik ez» daukala

Erredakzioa | IRUÑEA

Aralar Ildoak EAEko maiatzaren 13ko hauteskundeetan aurkezteko eskubidea eta aukera du, behin Hautes Batzorde Zentralean ordezkari legala izendatu eta gero. Herenegun iluntzean bukatu zen ordezkaria izendatzeko epea, eta Aralarrek eman zuen izena. Hauteskundeen egutegian hori da eman beharreko lehen pausoa bozetan aurkezteko, eta Aralar Ildoak eman du berea. Orain apirilaren 9an bukatuko da zerrendak aurkezteko epea, eta ikusi egin beharko da besteak beste Patxi Zabaleta abokatu eta Iruñeko EHko zinegotziak gidatzen duen mugimenduak zer egingo duen. Ildoak, Efe agenzia atzo zioenez, bihar bilera egingo du gai horren inguruan.

Zabaletak berak garrantzia kendu dio, hala ere, ordezkari legala izendatu izanari. «Horrek ez du inolako garrantzirik», esan zion atzo arratsaldean EGUNKARIARI Aralar Ildoko bozeramaileak. HBko Mahai Nazionalarekin «beste bilera bat» egitea espero dutela zioen Zabaletak ETBn emandako elkarrizketan, eta, halaber, espero duela akordiora iristea, «gure proposamenak —Gasteizko Legebiltzarrean ere parte hartzea— zutik dirauelako».



JOXE LACALLE

Aralar Ildoko kideak, joan den urteko irailean, Iruñean, jendaurreko euren lehen agerraldian.

PATXI ZABALETA

Aralar Ildoko bozeramailea

«Gure iritziak jendaurrean plazaratzen segituko dugu, Aralar Ildoa ez delako epe motzeko proiektua»

Dena den, bozeramaileak dio beren iritzi politikoak «jendaurrean» plazaratzen segituko dutela, eta Aralar Ildoa ez dela «epe motzeko» proiektua.

Zabaletak berak Batasuna prozesuan parte hartzen jarraituko duela esan du, proposamenak aurkeztu. «Hala ere, ez nuke ezeren oztopo izatea nahi», esan zigun atzo.

Julen Madariaga Aralar Ildoko kideak atzo Kataluniako Com Radion esan zuenez, berriaz, «ez da baztertu behar» ezker abertzale barruan «zatiketa» egotea, eta Aralar bere kasa aurkeztuko balitz Euskal Autonomia Erkidegoko maiatzaren 13 hauteskundeetara, «emaitza ona» lor dezakeela, «nahiz eta ez gauden prestatuta».

EH. «Nekazal eredu propioa» behar dela diote



EDURNE KOCH

EHk deitutako greba bultzatzeko premia ikusten dute nekazariek

Hainbat baserritar eta nekazari ados azaldu dira EHk *Burujabetza da bakea* lelopean apirilaren 10erako deitu duen greba orokorraren deialdiarekin, Euskal Herrian dagoen egoerarekin greba egitearen premia ikusten dutelako. Haien ustez, «burujabetza berreskuratu behar da, nekazal eredu propioa bultzatzeko, Euskal Herri osoa kontuan hartuta». Argazkian, nekazari batzuk atzo, Igeldo aldean.

EAJ. Arzalluz: «Historiak ez gaitu beldurtzen»



XOUSE SIMAL

EAJri buruzko liburua aurkeztu dute, «alderditik kanpo» egindakoa

Atzo aurkeztu zuten, Bilboko hotel batean, EAJren 1936tik 1979a arteko historia jasotzen duen *El pendulo patriótico* liburua. Xabier Arzalluz EAJko presidentea izan zen aurkezpenean, eta liburua alderditik kanpoko historialariek egin izana azpimarratu zuen. «Geure historiak ez digu beldurrik ematen», esan zuen. Ludger Mees, Santiago de Pablo eta Jose Antonio Rodriguez dira egileak.

ATXILOKETAK

Gaur deklaratu dute Madrilen astelehenean atxilotutako hiru lagunek

Erredakzioa | DONOSTIA

Astelehenean Coruña eta Gipuzkoan atxilotu zituzten Alicia Saez de la Cuesta, Eider Perez eta Aitor Olaizolak gaur deklaratu dute Madrilgo Entzutegi Nazionalan. Guardia Zibilak atxilotu zituen hiru lagun horiek eta inkomunikatuta izan dira bost egunetan.

Atxilotze agindua Ruiz Polancok eman zuen arren Garzonen aurrean deklaratu dute Polanco kanpoan delako egunotan. Atxilotuta horiengatik protestatzeko manifestazioa egin zuten atzo 300 lagunek Oreretan (Gipuzkoa), Eider Perez bertakoa baita. Era berean, asteazken gauean Ertzaintzak izaniko jarrera salatu zuten. Izan ere, Joxe Kruz Sarasolari —atzo askatu zuten bermea jarrita— ongiotarra egiteko zain zeuden lagunetarik bi eraman zituzten identifikatzeko.

Bestetik, Ainara Fresneda, asteartean Guardia Zibilak Irunen atxilotu zuen lesakarrak ere atxilotuta jarraitzen du, eta inkomunikatuta. Bere senideek *habeas corpusa* eskatu zuten eta ukatu egin diete. Lesakan plenoa egin zuten atzo atxilotaketa salatzeke.

AUZITEGIAK

Arrasaten atxilotu zituzten hiru gaztetik bi libre geratu dira

Erredakzioa | DONOSTIA

Ismael Moreno, Entzutegi Nazionalako epaileak behin-behinean aske utzi ditu Xabier Mondragon eta Igor Zearreta, asteartean Arrasaten (Gipuzkoa) Ertzaintzak, kale erasoekin lotura zutelakoa, atxilotu zituen gazteak. Aldiz, Alberto Martin preso sartu du. Morenok atzo hartu zien deklarazioa, inkomunikazio egoeran. Mondragonek eta Zearretak bi astean behin epaitegira aurkeztu beharko dute.